

国朝耆献类征初编

國朝耆獻類征初編

國朝耆獻類徵初編卷二百八十九目錄

將帥二十九

汪騰龍

富僧阿

劉輝祖

富當阿

李煦

傅良

努三

李國柱

珠爾格德

官達色

瑚什

申保

宗室弘晌

宗室舒景安

國朝書局刻書初編卷二百八十六目錄

國朝耆獻類徵初編卷二百八十九

通奉大夫前署江西巡撫江西布政使司布政使湘陰李桓輯
將帥二十九

汪騰龍

汪騰龍順天昌平人乾隆二年武進士授藍翎侍衛選江南江甯
協標浦口營都司十三年遷甘肅西甯鎮標前營遊擊十八年升
提標中軍參將二十三年擢直隸大名協副將二十四年大學士
川陝總督黃廷桂奏請暫畱騰龍護理西甯鎮總兵印務 命以
副將銜護理卽畱甘肅以副將另補尋補慶陽協副將二十五年
五月擢興漢鎮總兵八月調西甯鎮總兵二十六年 命往葉爾

羌換防三十一年三月回任八月遷陝西提督三十六年大兵進
勦小金川四川總督桂林出師南路咨調陝西兵二千名騰龍自
請帶兵赴軍前效用 允之三十七年二月抵卡了軍營時大兵
方攻東山梁及墨壟溝金川逆酋索諾木潛與小金川土司僧格
桑通謀屢遣兵助守抗拒防禦甚堅三月騰龍偕桂林等進攻扎
哇窠山梁奪獲溝口大礮五座石卡二十一處賊於對面山梁拒
守尋擊敗之乘勝克阿仰東山梁墨壟溝之眾皆潰進至達烏獲
賊寨十四礮房六百餘斃賊無算得 旨嘉獎並賞荷包四月參
將薛琮敗沒於果洲山桂林匿不奏報經散秩大臣銜前四川總
督阿爾泰偕總兵宋元俊劾其乖張欺罔並劾騰龍與桂林等終

日酣飲不理軍務桂林復以銀五百兩令汪騰龍交總兵王萬邦
贖取金川所掠軍士奏入得 旨褫桂林職騰龍解任候訊 命
額駙尙書公福隆安馳往嚴鞫六月福隆安奏提訊桂林等以所
劾各款惟薛琮敗沒未據實入告屬實騰龍等在營酣飲並無其
事其用銀贖取官兵一切初據汪騰龍供因金川送出官兵面稟
桂林以銀交王萬邦備賞嗣經研詰得實乃知州曹焜同知林儁
因我兵有迷失在山谷中者欲令土番尋覓故發銀備賞初非爲
向金川贖兵之用宋元俊等旣附會入奏欲實其語以危言怵王
萬邦云若不依參款書供恐致刑訊並教誘騰龍騰龍等爲所愚
遂亦扶同匿飾請 上革騰龍職以兵丁效力贖罪 上加恩賞

給參將銜 命自備資斧帶兵赴綽斯甲布駕馭土司等進剿尋

命領隊大臣舒常督辦十月參贊大臣阿桂以綽斯甲布革布什

咱兩路均可進擣金川賊境而金川所據綽斯甲布之地曰甲爾

壘壘距革布什咱尤近得之可以扼據要隘令騰龍偕侍衛音吉

圖等率兵由拉古鄂進攻中經甲魯破賊碉據之南攻正地溝口

破其水碉木柵 諭曰汪騰龍等進攻甲爾壘壘已得正地水碉

木柵似亦可望得力索諾木撤兵自衛僧格宗路賊勢必孤乘閒

犁巢自可剋期集事十二月將軍溫福阿桂等進克美諾僧格桑

遁入金川大軍分路進討騰龍等在甲魯望見山下火起分兵攻

正地溝口番眾奔潰獲碉六木柵二十三石卡六三十八年正月

副將軍阿桂以馬奈馬爾邦爲乾隆十二三年進剿金川之路亦係巴旺布拉克底與金川交界之所後路卽通格藏章谷諸處令騰龍率兵駐守十月副將軍明亮請以騰龍代理甘肅甯夏鎮總兵事務 諭曰汪騰龍人本平常且不能實在得力候補總兵敖成人甚可用卽應補授此缺汪騰龍原賞參將銜今所出有甘肅提標中軍參將卽令補授三十九年正月將軍阿桂復進討金川以南路僧格宗一帶四面受敵須熟於情形者料理請於總兵英泰參將汪騰龍二人中酌派一人統兵防守 上以騰龍專務口給不甚足恃 命用英泰嗣以明亮奏英泰亦須帶兵隨營 特命富勒渾在彼駐守經理令騰龍隨同辦事二月桂林奏僧格宗

驛卒李文遞送公文遇賊番被傷回站又據汪騰龍咨稱李文遇賊之日別差驛卒至科多亦至曉不反其爲賊匪潛放夾壩無疑上以僧格宗一帶係騰龍專駐防守旣不能先期防範事後又不上緊查拏下部嚴議嗣明亮奏李文所遇賊匪三十餘人並非親見而外委張盈所報雷虔被賊掠去更無影響明係爲逃兵裝點諭曰僧格宗一帶係責成汪騰龍專管乃於此等虛詞捏報之事並不卽時確查妥辦惟以一咨塞責該員向係專務口給獲有罪愆經朕棄瑕錄用仍不知改勉圖報錮染綠營惡習殊屬負恩汪騰龍著革職枷號示眾以示懲儆四月 諭曰見在防守僧格宗地方甚屬緊要雖已派海明帶兵駐防但伊未諳軍務且於番地

情形更未通曉必須派一諳練之員前往幫辦汪騰龍雖言不可信但伊在南路軍營日久粗知番地情形著加恩釋放隨海明辦理事務效力行走如伊不知感戴朕恩實心出力必從重治罪時海明在僧格宗軍營病故明亮請令總兵敖成前往駐守上復賞騰龍參將銜仍在僧格宗辦事諭曰敖成帶兵打仗自爲得力應畱於明亮軍營備用其僧格宗防守之事已派汪騰龍專辦並令痛加改悔若再專尚口給不冒實心出力卽難保全首領想彼亦稍知感畏但其地究不可無總統之人桂林見駐章谷著傳諭桂林不時往來僧格宗一帶一切畱心照料有應措辦機宜卽面交汪騰龍實力妥辦如見有虛浮不實之處卽據實奏參六月

桂林奏請將南路設駐兵丁移於納木覺爾宗一帶卽派騰龍移駐料理歸併添設事宜七月卒

右 國史館本傳

富僧阿

富僧阿舒穆祿氏滿洲正黃旗人雍正二年由閒散挑補拜唐阿
九年拔補藍翎侍衛十三年升三等侍衛乾隆八年升二等侍衛
九年七月充侍衛章京十二月充管侍衛印務章京十年三月升
頭等侍衛五月授三姓副都統十八年五月軍政屆期 上以富
僧阿不勝副都統降二等侍衛十二月補侍衛章京十九年授成
都副都統二十三年調三姓副都統二十四年調甯古塔副都統
二十五年疏奏盛京事宜一吉林甯古塔等處放票收濫文移所
關甚要請各按地方鑄給關防一甯古塔等處官學教習須清文
習熟之員向由官學生內挑補如一時不得其人卽於馬甲內通

融選補三年期滿教課有方報部以筆帖式補用其馬甲開缺另挑一三姓地方緝捕事宜向於發遣人犯內派充此等皆不安分之徒轉恐騷擾滋事請另設番役十名並派官員專管遇有失察將該員照例議處下軍機大臣議行二十八年正月授荊州將軍十二月調黑龍江將軍二十九年奏發到黑龍江給與旗人爲奴人犯所有隨帶妻子部文只稱將本犯賞給兵丁爲奴並無一併爲奴字樣是以未將伊等妻子爲奴俱聽另居度日見在伊等妻子並無管束養育之人不但易致爲匪卽伊等之夫牽連室家於各該主家亦不能安心服役請將見在發到並嗣後有原主將妻子一併送部發遣者俱給兵丁爲奴嚴加管束不致別生事端

上是之著爲令三十年正月奏索倫進貢貂皮毋庸自行呈送並請停鄂倫泰等賞賚 諭曰向來索倫進貢貂皮不特及等者例有賞賚卽不及等者朕亦加恩減半賞給以示體卹歷有年所今若停其賞賚則伊等無由霑受朕恩殊非嘉惠遠來之意嗣後著仍照舊例行閏二月奏該管兵內有應代祖父賠還銀兩請免息將本銀展季扣還官員亦照此例於季俸內坐扣兩月歸還新放新挑官兵遇婚喪賞借銀者不必待至下季卽將庫貯銀兩動借下軍機大臣議行八月疏稱據往探格爾畢齊河源之副都統瑚爾起稱自黑龍江至格爾畢齊河口計水程一千六百九十七里自河口行陸路二百四十七里至興安山其間並無人煙蹤跡又

往探精奇哩江源之協領納林布稱自黑龍江入精奇哩江北行至托克河口計水程一千五百八十七里自河口行陸路二百四十里至興安山其地苦寒無水草禽獸又往探西里木第河源之協領偉保稱自黑龍江經精奇哩江入西里木第河口復過英肯河計水程一千三百五里自英肯河口行陸路一百八十里至興安山地亦苦寒無水草禽獸又往探鈕曼河源之協領阿迪木保稱自黑龍江入鈕曼河復經西里木第河入烏默勒河口計水程一千六百十五里自河口行陸路四百五十六里至興安山各處俱無鄂羅斯偷越等語查呼倫貝爾與鄂羅斯接壤之額爾古納河西岸係鄂羅斯地界東岸俱我國地界處處設有卡座直至珠爾

特地方見復自珠爾特至莫哩勒克河口添設二卡於索博爾罕
添立鄂博逐日巡查鄂羅斯甯瑪爾斷難偷越其黑龍江城與鄂
羅斯接壤處有興安山延亙至海亦斷難乘馬偷越第自康熙二
十九年與鄂羅斯定界查勘各河源後從未往查嗣後請飭打牲
總管每年派章京驍騎校兵丁六月由水路與捕貂人同至扎克
英肯兩河口及鄂勒希西里木第兩河閒徧查回報總管轉報將
軍三年派副總管佐領驍騎校於冰解後由水路至河源興安山
巡查一次回時呈報其黑龍江官兵每年巡查格爾畢齊河口三
年亦至河源興安山巡查一次年終報部得 旨允行十月以齊
齊哈爾呼蘭二處本年田禾被水奏請借給旗戶穀一萬二千七